

MOCIÓN DO GRUPO MUNICIPAL DO PARTIDO POPULAR SOBRE A PERDA E DEVOLUCIÓN DE FONDOS EUROPEOS NEXT GENERATION CONCEDIDOS A ESTE CONCELLO POLA MANIFESTA INCAPACIDADE DO GOBERNO MUNICIPAL Á HORA DE ACOMETER OS PROXECTOS BENEFICIADOS EN TEMPO E FORMA DENTRO DOS PRAZOS ESTABLECIDOS

O portavoz do Grupo Municipal do Partido Popular de Vigo, conforme ao disposto no Regulamento Orgánico do Pleno do Concello de Vigo e da restante normativa aplicable, formula para o seu debate e eventual aprobación na vindeira sesión a seguinte

MOCIÓN

EXPOSICIÓN DE MOTIVOS

O pasado 29 de setembro o goberno municipal acordaba e resolvía a devolución de 3.000.000 de euros procedentes dos fondos europeos Next Generation que lle foran concedidos en abril de 2023 para acometer a reforma da torre do Concello no marco das axudas convocadas para a rehabilitación de edificios públicos. Unha cantidade á que lle tivo que sumar o pago de 257.000 euros en xuros pola non execución do proxecto subvencionado en tempo e forma dentro do prazo establecido, fixado para o vindeiro 31 de marzo de 2026.

A realidade é que este goberno municipal, dous anos e medio despois de ter concedida a axuda, nin tan sequera foi quen en todo este tempo de ter comenzado a executar o proxecto subvencionado. De feito, o calendario que manexa establece o remate das obras a finais de 2027. É dicir, case dous anos máis tarde do que debería. Unha mostra máis da súa ineficacia, incapacidade e incompetencia á hora de xestionar estes fondos. E iso, se se leva a cabo...

Xa que logo, a pregunta é Que vai a pasar agora con este proxecto? Vaise facer si ou si ou vai acabar nun caixón coma tanto outros? E no caso de seguir adiante, Como pensa financiar o goberno municipal os 3.000.000 de euros devoltos? Vannos pagar os viganeses do seu peto?

Iso foi precisamente o que aconteceu coa reforma do parque infantil "Camilo José Cela", que tamén contaba cun financiamento dos Next Generation de 120.000 euros, condicionados á execución da obra antes do 31 de decembro de 2023. Prazo que este goberno tamén se amosou incapaz de cumprir polo que, do mesmo xeito, tivo de devolver os cartos e acometer as obras, finalizadas cun atraso de 15 meses, con cargo aos orzamentos municipais.

O mesmo que aconteceu coa reforma do Mercado de Teis, que tamén perdeu a achega europea de 670.000 euros da que foi beneficiario este goberno municipal. Unha vez máis, foi incapaz de cumprir cos requisitos e prazos, de xeito que agora seremos os viguenses os que acabaremos pagando a súa incompetencia poñendo os cartos dos nosos impostos para acometer a devandita reforma.

O que non sabemos se finalmente se levará a cabo será o parque infantil “A Reconquista”, no Berbés, para o que tamén se concederon 120.000 euros, xa perdidos; ou a plataforma online para o pequeno comercio, o famoso “Amazon vigués”, do que nunca se moveu un só papel. Unha iniciativa enmarcado dentro do Programa de axudas para o fortalecemento da actividade comercial en zonas turísticas que contaba cunha axuda de 370.000 euros, que tamén se perdeu.

En total cinco proxectos, por importe de 4,5 millóns de euros, dos que o alcalde presumiu abertamente cando se lle concederon os fondos, pero dos que ten calado e se nega a informar logo da perda dos mesmos. O que deixa ás claras o fracaso do seu goberno, que dende o ano 2022 conta cun área específica para xestionar e coordinar a solicitude, seguimento e xustificación dos fondos europeos, da que a máxima responsable e a Terceira Tenente de Alcalde, Elena Espinosa.

Un estrepitoso fracaso que se amosa tamén na recente decisión de sacar á licitación un servizo externo de antena e xestión técnica de proxectos cofinanciados a través de programas europeos e outras convocatorias nacionais e internacionais, que lle vai custar as arcas municipais 785.000 euros.

Por todo isto, a presenta moción eleva ao Pleno de Vigo para o seu debate e eventual aprobación os seguintes

ACORDOS:

1.- Esixir as responsabilidades políticas deste goberno municipal pola perda e reingreso de máis de 4,5 millóns de euros de fondos Next Generation concedidos para cinco proxectos non executados, ou executados forza de prazo: reforma do mercado de Teis; fortalecemento da actividade comercial en zonas turísticas (Amazón vigués); renovación parque Camilo José Cela; instalación parque infantil “A Reconquista” no Berbés; envolvente torre do Concello


2.- Esixir a comparecencia urxente da Terceira Tenente de Alcalde e responsable da Área de Goberno de Fondos Europeos, Elena Espinosa, para que informe detalladamente das circunstancias polas que se teñen perdido eses fondos, así como dos plans do goberno respecto do futuro que lle agarda a estes proxectos que xa non contan con financiación europea, e os prazos e grao de execución do resto de proxectos que aínda están vixentes.

3.- Axilizar os trámites pendentes para todos aqueles proxectos beneficiarios aínda en prazo logo de que a execución dos fondos Next Generation remate con carácter xeral o vindeiro 31 de agosto de 2026.

4.- Crear unha Comisión de seguimento municipal que fiscalice a correcta xestión dos fondos europeos para asegurármonos de que non se perda ni un só euro máis pola ineficacia deste goberno local.

5.- Esixir explicacións de por que este Concello ven de sacar a licitación un servizo externo de antena e xestión técnica de proxectos cofinanciados a través de programas europeos e outras convocatorias nacionais e internacionais, cando este goberno municipal xa conta cunha concelleira, a Terceira Teniente de Alcalde Elena Espinosa, como responsable directa destas tarefas.

Vigo, 22 de outubro 2025



José Miguel Martín Peña

